

ማክቢቤ ማፃኣፖ ዓይያ ካር

ማክቢቤ ማፃኣፖይዳ ፃኣፒንቲ ዓኣሢ ዓሲ ናንጋ ዎዴ ቃሚሢ ማዔሢ ሌሊቱዎንቲ ኬሰኪሢ ኬዲሢና ሜቶና ዲቤያ፡ ዎጌ ዎቢሢንታ ሂርጋንታ ኩሚያ ማዲያ ዔሪያይዳፓ ዔቁያና «ዓሲኮ ናንጊ ጉሪ ባኣዚኬ» ጌይ ኬኤዜ ፔቲ ዔር ዓሲሰኬያኮ ማለሢኬ። ዬይ ዓሢ ዓሲ ናንጊኮ ጋፒንሢ ዎማካታቲያ ዔሪ ዎይሢ ያኣሲኮ ማለያ ዔራኒ ዳንዳዒባኣሴ፤ ያዲ ማዔያታቲያ ናንጊንታ ዎዴ ቢያና ዓሲም ዳንዳዒንታማጉዲ ደዲ ማዲሢና ያኣሲ ዒንጋ ባኮና ዎዛዳንዳያ ኮይሳሢ ዓሶ ዒ ዘራኔ።

ዬያ ዓሢኮ ማለያኮ ባሼሢ ዎለና ካኣሙዎ ማለሢ ዓኣያ፡ ጊንሢ ሃሢ ሃጊ ማዓ ዎዛ ቲቁሢ ማለሢያ ኩሚያኬ፤ ያዲ ማዔያታቲያ ሃና ማፃኣፒላ ጌኤዢ ማፃኣፖይዳ ዓኣያ ማዲያ ጌኤዢ ማፃኣፖኮ ጎኑማ ሜሌ ዓታዛ ዬያ ዎለና ካኣሙዎያ ማዔ ማለያንታ ሂርጎ ማለያ ኩሚ ማፃኣፖዎ ቃሲ ዓርቁያ ዳልጊ ማዔሢ ዔርዛኬ። ሃይ ማክቢቤ ማፃኣፓ ዓሲኮ ናንጊ ለማሌኤሸጉዲ ዳዎሢር ሚርጌ ዓሲ ሃና ማፃኣፖፓ ደዲም ዴንቁኔ፤ ዬያጉዲ ሃሢ ዬያ ማለያ ዔርዛ፤ ሃና ፔቲ ጌኤዢ ማፃኣፒላ ናንጊም ዴኤፒ ቤሲ ዒንጋ ያኣሲዳ ሃጊ ማዓ ጉሙርቁሢ ጌሢኒ ዳንዳዒያ ማዲያ ዘራያታሢ ዔያታ ዔሬኔ።

ማፃኣፒላ ዲማ ዲማ ዓርቁ ባኮ

- ናንጊ ጌይሢ ዎዚ ጌይሢታቲያ (1:1—2:26)
- ቢያ ባኣዚኮ ዎዴ ዓኣያ ማዔሢ (3:1-8)
- ናንጊ ቢያ ዎዴ ኮሺ ማዕዎታሢር ዔራቶና ናንጊሢ ዛላ (3:9—6:12)
- ሼምፔ ዛላ ማለሢ (7:1—8:17)
- ሴካ ቤርቲም ዓይጌ ማዓንዳቲያ ያኣኒያ ዔራዎያ ማዔሢ (9:1—11:8)
- ያኣሲ ቦንቸሢና ዒዛም ዓይሢንቲሢ ዛላ (11:9—12:14)

ቢያ ባኣዚ ጉሪ ማዔሢ
¹ ዬሩሳላሚይዳ ካኣታዴ፡ ዔራሢ፡ ዳውቲ ናኣዚ ኬኤዜ ዔራቶ ሃይሳ ያዲኬ፤ ² ዒዚ ሂዚ ጌዔኔ፡ ቢያ ባኣዚ ጉሪ፡ ጉሪፓኣ ጉሪ ባኣዚኬ፤ ቢያ ባኣዚ ጎኔና ጉሪኬ። ³ ዓሲ ናንጋ ዓጮይዳ ማዲ ላቢንታ ባኮኮ ዴንቆንደ ባካ ዓይጎዳይ? ⁴ ፔ ዎደና ዓኣ ዓሳ ጋፔም

ሜሌ ዓሲ ቤዛ ኬሰካኔ፤ ሳዓ ጋዓንቴ ላኣሚንቴዎ ሩንገና ዶዲ ሩንጋኔ።⁵ ዓቢ ኬሰኪ ጌላኔ፤ ገንሣ ሃሣ ኬሰኪ ቤዛ ባንሢ ሄላኒ ሩኡራኔ።⁶ ዠባሬ ሊካ፣ ገንሣ ሃሣ ሌካ ዠባርሻኔ፤ ሺራኣ ሺራ ገንሣ ማዓኔ።⁷ ዎሮ ዎኣፃ ቢያ ባዞ ባንሢ ጎዓኔ፤ ባዞ ጋዓንቴ ኩሙዎኣሶ፤ ዎኣፃ ዓልቁ ኬሰካ ቤዛ ገንሣ ማዒ ዴንዳኔ።⁸ ቢያ ባኣዚ ላቢሲ ሸሸሩሳያኩ፤ ዬያ ሸሩሲያ ዓሲ ሃያኩ ጌይ ኬኤዚ ጋፒሳኒ ዳንዳዑዎያኩ፤ ዓኣፒ ዛገ፣ ዎይዚያ ዎይዚ ታኣሞ ጊዴኔ ጎዑዎሴ።⁹ ሚና ቤርታ ማዔ ባካ ገንሣ ሺሪ ማዓኔ፤ ሃሢ ማዲንታ ባካ ቢያ ቤርታኣ ማዲንቴያ ዔርታ ባኣዚኩ፤ ዬያሮ ዓጪ ማዔ ካራናይዳ ቢያ ዓኪ ጌይንታ ባኣዚ ባኣሶ።¹⁰ ዓይጎ ዓሲያኣ፡- «ሃይሾ ሃይ ዓኪ ባኣዚኩ!» ጌዔቴ ዬይ ባካ ኑ ሾይንታንዳሢኮ ቤርታ ዓኣያ ማዒ ዔርታያኩ።¹¹ ገንሢሞ ዓኣዴ ዎይይዳ ማዲንቴ ባኮ ቢያ ጳቂሢ ዔራይ ባኣሶ፤ ዬያቶ ሄሊ ገንፆ ሙካ ባኮ ማዔቴያ ሙካ ዎይይዳ ዓኣ ዓሶሞ ማላታ ማዓ ባኣዚ ባኣሶ።

ዔር ዓሢ ፔ ሩንጎይዳፓ ዴንቁ ዔራቶ

¹² ታኣኒ፣ ሃያ ሃይሶ ኬኤዛሢ ዬሩሳላሜይዳ ዴዒ ዒሰራዔኤሌ ዓሶ ዎይሢ ካኣቲኩ፤¹³ ጫሪንጮኮ ዴማ ማዲንቴ ባኮ ቢያ ኮሺ ዛገ ዔራኒ ታኣኒ ማሌኔ፤ ሃያ ዴኤሢ ጫኣና ዓሲ ናይ ኬዲ ላቢንታንዳፒዲ ፆኣሲ ዔያቶሞ ዒንጌኔ።¹⁴ ዓካሪ ሃያ ዓጮይዳ ማዲንቴ ባኮ ቢያ ታ ዛጌኔ፤ ጋዓንቴ ቢያ ባካ ጉሪ ማዔሢ ታ ዴንቁኔ፤ ቢያ ባካ ዠባሬ ኩቻ ዴኡሚ ዓርቃኒ ጌይሢጉዲኩ።¹⁵ ዎቦ ባኣዚ ፒካኒ ዳንዳዑዎሴ፤ ባኣ ባኣዚያ ፓይዲንታኒ ዳንዳዑዎሴ።

¹⁶ ታኣኒ ታ ዒኖና፡- «ታኣኮ ቤርታ ዬሩሳላሜ ዎይሢዞንሢፓ ቢያ ባሺ ዴኤፒና ዔራ ዓሲያኣ ታ ማዔኔ፤ ዔራቶና ጪንጩሞና ዓይጎታቴያ ሚርጌና ታ ዛጌኔ» ጌዔኔ፤¹⁷ ዔራቶና ጪንጩሞና፣ ገንሣ ዠኣሹሞና ዔኤያቶና ዔራኒ ታኣኒ ታ ዒኖና ኮሺ ማሌኔ፤ ዬይያ፡- ዠባሬ ኩቻ ዴኡሚ ዓርቃኒ ማሊሢጉዴያ ማዔሢ ታ ዔራሬ።¹⁸ ጪንጩሞ ሚርጌ ዎዶና ማሊሢ ሚርጋኔ፤ ዔራቶ ሚርጋዛኣ ማሊ ሚታዲ ዲባኔ።

2

ሳዓይዳ ዓኣ ዎዛ ጉሪ ማዔሢ

¹ ታኣኒ ታና ዎዛሳኒና ዎዛ ጌይሢ ዓይጎ ማዔቴያ ዛገ ዔራኒ ማሌኔ፤ ጋዓንቴ ዬይ ጉሪ ማዔሢ ታ ዴንቁኔ።² ሚኢቺ ዔኤያቶይዳፓ ዲማዲባኣያ፣ ገንሣ ሃሣ ዎዛኣ ፓሣ ባኣዚ ባኣያ ማዔሢ ታ ዔራሬ።

1:16 1:16 1ካኣቶ. ማ 4:29-31።

3 ይይ ቢያ ማዕቲያ ጨንጨዋ ዳንቃኒ ታኣኮ ዓፃዳ ማሊያ ገንዖ ዓኣዲ ዒኖ ታኣኮ ወይኖ ዑዠና ወዛሲ ወዛሲ ሃውሻንዳ ወዴ ዓኣያ ማሃኒ ታ ዒኖና ታኣኒ ማሌኔ፤ ዓሲ ቢያ ሳያይዳ ናንጋ ቃሚያ ናንጎማ ጋራ ማዳቲ ኮሺ ማዓንዳ ባኣዚ ዓይጎታቲያ ታ ዔራኒ ኮዔኔ።

4 ፔቴ ዳኤፒ ባኣዚ ታኣኒ ማዳኔ፤ ዩይያኣ፡- ናንጎንድ ማኣሪ ታ ማገፍኔ፤ ወይይያ ታኣኒ ቱኬኔ፤ 5 ዲማ ዲማ ዓኣፒ ዓኣፓ ሚሢንታ ሚዛጲ ቡኒንታ ሜሌ ሚሢያ ቱኮንድ ቤሲ ታ ገኢጊሼኔ፤ 6 ዑጋ ሚያ ዑሻኒ ወኣሢ ዳይሃንድ ቦቆሊያኣ ታኣኒ ቦኣኬኔ፤ 7 ዓቲንቁንታ ላኣሊ ካራሚያኣ ታ ሻንቁኔ፤ ሜሌ ሃሣ ማኣራ ታኣኮ ማዳ ዓሳ ሾዔ ዓይሌ ታኣኮ ዓኣኔ፤ ታኣኮ ቤርታ ዩሩሳላሚይዳ ናንገጌ ዓሶፓ ቢያ ባሼ ሚርጌ ባይንታ ወኣሪንታ ማራይያኣ ታ ቆሌኔ። 8 ታኣኒ ወይሣ ዓጮኮ ዲማ ዲማ ፓቁንቲ ዓጮይዳፓ ቢራንታ ወርቁንታ ቡኩሲ ዲቢ ቆሎ ታ ዳንቁኔ፤ ታና ዓኣሢ ዓኣሢ ሄርሺ ኮርጋንዳ ዓቲንቁንታ ላኣሊንታ ታኣኮ ዓኣኔ፤ ዓሲም ኮሺንታና ወዛና ዒንጋኒ ዳንዳዓ ሚርጌ ላኣሊያ ታኣኒ ቡኩሲ ዔኬኔ።

9 ዩይይዳፓ ዔቁያና ታኣኮ ቤርታ ዩሩሳላሚይዳ ናንገጌ ዓሶፓ ቢያ ባሼ ዳኤፒ፡- ቦንቸንቲ ዓሲ ታኣኒ ማዔኔ፤ ዔራታኣ ታኣኮ ታኣና ደዲ ናንገጌኔ። 10 ዓኣፓ ታኣኮ ዛጌሢንታ ዒና ታኣኮ ዓፃዳ ባኮ ቢያ ታ ዳንቁኔ፤ ታ ዑፆም ኮይሳ ወዛ ቢያ ታ ላኣጊባኣሴ፤ ላቢ ታ ማዳ ባኮና ቢያ ታኣኒ ወዛዳሢሮ ዓካሪ ታኣም ጎዶናማ ዩማኬ። 11 ዩያ ቢያ ታ ማዳሰካፓ ዩያ ታኣኒ ዳንቃኒ ላቢ ማዳ ማዳ ቢያ ዛጋዛ ዔኤቢ ፓሡወ ባኣዚ ማዔሢ ታ ዛጌኔ፤ ዩያ ሌሊቱዋንቲ ዠርባሪ ኩቻ ዲኡሚ ዓርቃኒ ማሊሢጉዳያ ጉሪ ባኣዚ ማዔሢ ታ ዳንቁኔ። 12 ወይቲቲያ ካኣታ ማዳኒ ዳንዳዓሢ ዒዛኮ ቤርታ ዓኣ ካኣታ ማዳሢ ዛጌሢናኬ፤ ዩያር ታኣኒያ ዔራቶንታ፡ ዔኤያቶንታ ዣኣሹዋዋ ዓይጎታቲያ ዛጌ ዔራኒ ታ ኮሺ ማሌኔ። 13 ዩካፓ ታ ሂዚ ጌዔኔ፡- «ጎኔና ፖዒ ዲሚዳፓ ኮሺ ማዔ ጎይያ ዔራቶዋ ዔኤያቶይዳፓ ኮሺ ማዔሢ ታ ዛጌኔ። 14 ዔራ ዓሲ ዔቁ ቤዘንታ ዳንዲ ሄላንዳ ቤዘንታ ዔራኔ፤ ዔኤያ ዓሲ ጋዓንቲ ዩያ ቢያ ዔሩዋሴ» ያዲ ማዔቲያ ዔራሢንታ ዔኤያሢንታ፡ ላምፖሃሢ ካፔ ባካ ፔቲ ባኣዚ ማዔሢ ታ ዔሬኔ። 15 ዩያር፡- «ዔኤያሢ ሄላ ባካ ታናኣ ሄላንዳያኬ፤ ዩያር ሃያይዲ ታኣኮ ዔር ማዒፃ ዓይጎ ታና ማኣዳይ?» ጌይ ታ ዒኖና ታ ማሌኔ። ቤዘማና ታኣኒ፡- «ዩይ ቢያ ጉሪኬ!» ጌዔኔ። 16 ዔራሢ ማዔቲያ ዔኤያሢ፡ ላምዓሢ

2:4 2:4 1ካኣቶ. ማ 10:23-27፤ 2ዎኣሲ. ዓሃኬ 9:22-27። 2:7 2:7 1ካኣቶ. ማ 4:23። 2:8 2:8 1ካኣቶ. ማ 10:10፤ 14:22። 2:9 2:9 1ዎኣሲ. ዓሃኬ 29:25።

ሚርጌ ዎዴ ማሊ ዔያቶ ጳቂሣንዳ ዓሲ ባኣሴ፤ ሃጊ ሙካ ዎድይዳ ኑኡኒ ቢያሢ ዋለንቲ ዓታንዳኔ፤ ዔር ዓሶ ማዔቴያ ዔኤዮ ዓሶ፥ ኑና ቢያሢ ሃይቢ ካፒ ዓኣኔ። 17 ማቶይዳፓ ዓታዛ ታኣኒ ዴንቄ ባኣዚ ባኣሢር ናንጊ ጌይሢ ዎዚ ጌይሢታቴያ ታኣሞ ዔርቲባኣሴ፤ ዩይ ጉሪ ማዔሢር ዠባሬ ኩቻ ዱኡሚ ዓርቃኒ ማሊሢጉዴያኩ።

18 ታኣኮ ዓኣ ቆሎ ቢያ ታ ቤዛ ጌላሢሞ ሃሺ ታ ዓኣዳንዳሢር ሃያ ሳዖይዳ ታኣኒ ላቤሢንታ ዲቢሺ ታ ዴንቄ ባካ ቢያ ጉሪኩ፤ 19 ታኣኮ ጊንዖ ሙካንዳሢ ዔራ ማዔቴያ ዔኤያ ዱማዲ ዔርቲቀሴ፤ ያዲ ማዔቴያ ታኣኒ ላቤሢንታ ዲቢሺ ታ ዴንቄ ባኮ ቢያ ዒዚ ዔከ ዓዶ ማዓንዳኔ፤ ዩይያ ጉሪኩ። 20 ዩያር ሃያ ዓጮይዳ ታ ማዳሢንታ ላቤ ባኮ ቢያ ታ ማላዛ ሃጊ ማዓ ዎዛ ባኣ ዓሲ ታና ማሄኔ። 21 ኔኤኮ ዓኣ ዔራቶና ኔ ዴንቄ ጨንጨሞና ኔ ሜታዲ ዴንቄ ባኮ ቢያ ፔቴታዖ ላቢባኣ ዓሲሞ ሃሺ ኔ ዓኣዳንዳኔ፤ ዩይያ ጉሪ ማዔሢር ጉሪ ላቢሢኩ። 22 ሂዳዖ፥ ዓሲ ማሊ ሜታዲ ፔ ናንጎ ዎድይዳ ላባ ባኮኮ ቢያ ዴንቃንዳ ባካ ዓይጎዳይ? 23 ዓሢ ፔ ናንጎ ዎድማና ዒ ማዳ ባካ ቢያ ዒዛ ዖዱሳያና ማሊሳያ ማዓማፓ ዓታዛ ፔቴታዖ ዒዛ ማኣዳንዳ ባኣዚ ባኣሴ፤ ዩያ ሌሊቲቀንቴ ቀንቶታዎ ማሊፃፓ ዒ ሃውሻዓኩ፤ ዩይ ቢያ ጉሪኩ።

24 ዓካሪ፥ ዓሲሞ ማዓንዳ ባኣዚ ዓይጎዳይ ጌዔቴ ላቢንቲ ማዲ ዴንቄ ባኮ ቢያ ሙይ ዑሽኪሢና ፔና ዎዛሲሢኩ፤ ዩይያ ዖኦሲዳፓ ዒንጊንቴያ ማዔሢ ታ ዔሬኔ። 25 ዒዚ ጌይባኣንቴ ሙይ፥ ዑሽኪያ ዑሽኪ ኮሹሞንታ ዎዛንታ ዴንቃኒ ዖኣኒ ዳንዳዓይ? 26 ዒዛ ዎዛሴ ዓሲሞ ዖኦሲ ዔራቶንታ ጨንጨሞንታ ዎዛኣ ዒንጎኔ፤ ጎሜ ዓሲሞ ጋዓንቴ ላቢሢ ሌሊ ማዓኔ፤ ዩያር ዒዚ ቡኩሴ ቆሎ ቢያ ላቢንቲባኣያ፥ ጊንሣ ሃሣ ዖኦሲ ዎዛሴ ሜሌ ዓሲሞ ሃሺ ዓኣዳንዳጉዲ ዒዛ ማሃኔ፤ ዩይያ ቢያ ጉሪ ማዔሢር ዠባሬ ኩቻ ዱኡሚ ዓርቃኒ ማሊሢጉዴያኩ።

3

ቢያ ባኣዚኮ ዎዴ ዓኣያ ማዔሢ

- 1 ሃይካ ሳዓ ማዲንታ ዓይጎ ባኣዚያ ቢያ ማዲንታንዳጉዲ ዖኦሲ ጌሢ ሌዔና ዎዴና ዓኣኔ፤
- 2 ዩያር ዖኦሲ ጌሢ ጎይዖና፡-
ሾይንታኒ ዎዴ ዓኣኔ፤

2:23 2:23 ዓ.ዮ. 5:7፤ 14:1። 2:24 2:24 ማክ. 3:13፤ 5:18፤ 9:7፤ ሉቃ. 12:19፤ 1ቆሮ. 15:32። 2:26 2:26 ዓ.ዮ. 32:8፤ ኮኣኪ. 2:6።

ሃይቃኒ ዎዴ ዓኣኔ፤
ቱካኒ ዎዴ ዓኣኔ፤
ቱጋኒያኣ ዎዴ ዓኣኔ።

3 ዎዳኒ ዎዴ ዓኣኔ፤
ፓሣኒያ ዎዴ ዓኣኔ፤
ማዣኒ ዎዴ ዓኣኔ፤
ሻሃኒያኣ ዎዴ ዓኣኔ።

4 ዬኤካኒ ዎዴ ዓኣኔ፤ ሚኢጫኒ ዎዴ ዓኣኔ፤
ሲያኒ ዎዴ ዓኣኔ፤
ኮርጋኒያኣ ዎዴ ዓኣኔ።

5 ሹጮ ቡኬ ቤዛፓ ላኣላኒ ዎዴ ዓኣኔ፤
ጊንሣ ቡኩሳኒያኣ ዎዴ ዓኣኔ፤
ኮንቃኒ ዎዴ ዓኣኔ፤
ሃሺ ዲማዳኒያኣ ዎዴ ዓኣኔ።

6 ዔኤቢ ኮዓኒ ዎዴ ዓኣኔ፤
ኮዑዎፖ ሃሻኒያኣ ዎዴ ዓኣኔ፤
ቡኩሲ ዓርቃኒ ዎዴ ዓኣኔ፤
ላኣሊ ባይዛኒያኣ ዎዴ ዓኣኔ።

7 ዳርዛኒ ዎዴ ዓኣኔ፤
ሲካኒያኣ ዎዴ ዓኣኔ፤
ዘቲ ጋዓኒ ዎዴ ዓኣኔ፤
ጌሰታኒያኣ ዎዴ ዓኣኔ።

8 ናሽካኒ ዎዴ ዓኣኔ፤
ዒፀኒያኣ ዎዴ ዓኣኔ፤
ፆልዚኮ ዎዴ ዓኣኔ፤
ኮሹዎኮዎ ዎዴ ዓኣኔ።

9 ዓካሪ፥ ማዳሢ ፔ ላቢፃፓ ዴንቃ ባካ ዓይጊንዴዳይ? 10 ዓሲ
ናይ ማዳ ላቢንታንዳጉዲ ፆኦሲ ዔያቶም ዒንጌ ዴኤፆ ኬዶ ታኣኒ
ዛጌኔ። 11 ፆኦሲ ፔቲ ፔቲ ባካ ማዳንታንዳጉዲ ዎዴ ጌሢሥና ቢያ
ባኮ ሚዛጲ ማሂ ኮሼኔ፤ ዓሲ ናንጊና ናንጋያ ማዔሢ ዔራንዳጉዲ
ዒኔ ዒንጌኔ፤ ዓሲ ጋዓንቲ ዬያ ዒ ማዳ ባኮ ቢያ ጋፒሲ ዔሩዋጉዲ
ዒ ማሄኔ። 12 ዓሲ ሸምፔና ዓኣፆ ዎዛዲሢና ኮሺ ባኣዚ ማዳሢናፓ
ባሺ ባኣዚ ባኣሢ ታ ዔሬኔ። 13 ዓሲ ሜታዲ ላቢ ዴንቁሢ ዛሎ ሙይ
ዑሽከ ዎዛዳንዳጉዲ ፆኦሲ ዒንጌኔ።

14 ፆኦሲ ማዳ ባካ ቢያ ናናንጋያታሢ ታ ዔሬኔ፤ ዬያይዳ ቃሲንታ
ባኣዚያ ማፆም ዔከንታ ባኣዚያኣ ባኣሲ፤ ፆኦሲ ዬያ ማዳሢ ዓሲ
ዒዛ ዒጊጫንዳጉዲኩ። 15 ሃሢ ዓኣ ባካ ቢያ ዎንዴ ቤርታ ዓኣ

ባአዚኬ፤ ሴካ ቤርታ ማዲንታ ባካ ሚና ዓኣያኬ፤ ያኦሲ ዬያ ቤርታኣ ባኮ ጊንሣ ማዲንታጉዳጉዲ ኮኮዓኔ።

ሳፆይዳ ፒዜ ዋጌ ዋጊነቱዋያ ማዒያ

16 ሳፆይዳ ሜሌ ባአዚ ታ ዛጋኔ፤ ዬይያ፡- ፒዙሞ ማዲንታጉዳ ቤዛ ዋይዚ ዒዲሣ፡ ፒዜ ዋጌ ዋጊነድ ቤዛ ጌኔ ማዶ ዲቤሣ ታ ዴንቄኔ። 17 ታኣኒያ፡- «ቢያ ባአዚኮ ጋፒንሣ ዋዴ ዓኣሣረ ዋይዘ ዒዳ ዓሶይዳ ማፆሞ ፒዜ ዓሶ ዑፃ ያኦሲ ዋጋንዳኔ» ጌይ ማሌኔ። 18 ዬያ ሌለቱዋንቴ፡- «ዓሲ ቆልሞይዳፓ ዓይጎናኣ ዲማዲዋኣሣ ዒያታ ዔራንዳጉዲ ያኦሲ ዔያቶ ዲማ ዲማ ባአዚዳ ጌልዚ ዛጋኔ» ጌይ ታኣኒ ማሌኔ። 19 ጎኔና ዓሲና ቆልሞና ካፒ ዓኣማ ፔቱ ባአዚኬ፤ ዓሳ ሃይቃሣጉዲ ቆልሞኣ ሃይቃኔ፤ ለምፆንሣኮ ዑኡዘ ዔኪፃ ዋሊ ማላያኬ፤ ዓካሪ፡ ለምፆንሣ ዔኤቢ ጉሪ ባአዚ ማዒሣረ ዓሲ ቆልሞይዳፓ ዲማቱዋሴ። 20 ዓሲ ማዒቲያ ቆልሞ ለምፆንሣ ፔቱ ቤሲ ዓኣዲንዳኔ፤ ዬይያ፡- ዔያታ ዓጪዳፓ ኮሺንቴያ ማዒሣረ ጊንሣ ዓጪ ባንሣ ማዒንዳኔ። 21 ሂዳያ፡ ዓሲኮ ሸምፓ ሌካ ዓኣዲሣና ቆልሞንታ ቦፆንታኮ ሸምፓ ሌካ ሳፆ ጌላሣ ዲማሲ ዔራሣ ያናዳይ? 22 ዓሲ ካፒ ዓኣማ ፔኤኮ ማዴ ማዶና ዋዛዲሣታሣረ ዬያፓ ባሽ ባአዚ ባኣሣ ታኣኒ ዛጌኔ፤ ዬያኮ ጊንፃፓ ማዒንዳ ባኮ ለሚ ጊንሣ ዒ ዛጋንዳጉዲ ማሃንዳሣ ያናዳይ?

4

ሄርቁንቲ ዋርቁሣ፡ ላቢ ማዲሣ፡ ላጌ ባኣያ ማዒሣ

1 ሃያ ሳፆይዳ ዋጌኮ ፒዙሞ ፓጪሣንታ ጌኔ ማዶንታ ታ ዛጌኔ፤ ሄርቁንቲ ዋርቃ ዓሳ ዔያቶ ደዲሻያ ባይዚ ዬኤካኔ፤ ኮዔ ባአዚ ማዲኒ ቢታንታ ዔያቶ ዋይሣ ዓሶ ኩጫታሣረ ዔያቶ ማኣዳንዳ ዓሲ ዬይ ዓሳ ዴንቄ ባኣሴ። 2 ዬያሮ ታኣኒ፡- «ሃያይዲ ሸምፔና ናንጋዘንሣፓ ሚና ቤርታ ሃይቁ ዓሳ ዋዛዲ ናንጋኔ» ጌዔኔ። 3 ጋዓንቲ ዬንሣ ለምፆንሣፓ ሃጊ ሸይንቲባኣያ፡ ጊንሣ ሃሃ ሃያ ዓጮይዳ ሄርቁ ዋይሣያና ጌሮ ማዶዋ ዛጊባኣዘንሣ ባሊቲና ዓኣያኬ።

4 ሜሌ ሃሃ፡- ዓሲ ፔ ኮዔ ባኮ ዴንቃኒ ደዲ ማዲ ላባሣንታ ማዲኣ ጊኢጋሣ፡ ፔኤኮ ላጎ ዛጊ «ታኣም ማዒኣቢሽ» ጌይሣና ማዒሣያ ታ ዔሬኔ፤ ዬይ ቢያ ጉሪታሣረ ዠባሬ ኩቻ ዓርቃኒ ማላሣጉዴያኬ። 5 ኩቻ ማርቲ ዴዓ ቤልፃ ዓሲ ፔና ናይዚና ዋዶኔ። 6 ዠባሬ ኩቻ ዓርቃኒ ማላሣጉዴያ ዔርቲባኣ ማላሣና ሚርጌ ባአዚ ዴንቃኒ ላቢንቲፓ ሂርጋባኣ ሃውሺሣና ዳካ ዴንቃኒ ማዲሣ ቃራኬ።

7 ጊንሣ ሃሣ ሃያ ሳይደዳ ማዲንታ ሜሌ ጉሪ ባኣዚ ታ ዛጌኔ፤
 8 ናይ፣ ሃሣ ጌርሲባኣያ ፔኤሮ ሌሊ ናንጋ ፔቴ ዓሲ ዓኣኔ፤ ያዲ
 ማዕቴያ ቢያ ዎዳ ዒዚ ማደና ላቢንቲፓ ጊንሣሞ ጎዑቀሴ፤ ጊንሣ
 ዴንቃ ቆላ ጊዴኔ ጌይ ዔሩቀሴ፤ ዬያ ሌሊቱዋንቴ «ታ ላባሢ
 ያኦምዳይ? ታ ታኣሮ ታና ዎዛዲያ ላኣጋሢ ዓይጎርዳይ?» ጌይ ፔና
 ያኦጫኔ፤ ዬይ ቢያ ጉሪ ባኣዚ፣ ጊንሣ ሃሣ ማቶ ናንጊኤ።

9 ዓያቶ ማደኮ ዓኣፓ ኮሺ ማዓኒ ዳንዳዓሢሮ ፔቴ ሌሊ ማዓሢፓ
 ላምዎ ማዓሢ ባሺኤ። 10 ላምዎ ዓሲፓ ፔቴማ ሎኦሜቴ ባጋሢ
 ዔቁሳንዳኔ፤ ፔኤሮ ሌሊ ማዕ ዓሲ ሎኦሜቴ ዬያ ዔቁሳንዳ ዓሲ
 ባኣሢሮ ዒዛ ባዴዔ። 11 ላምዎ ዓሲ ዎላ ላሃቴ ያይደዳ፤ ፔኤሮ
 ላሃ ዓሲም ዎዲ ያይደንዳይ? 12 ፔቴ ዓሲ ፔኤሮ ሌሊ ማዓ ቃዛኒ
 ዳንዳዑቀ ባኣዚ ላምዎ ማዓ ቃዛኒ ዳንዳዓኔ፤ ሃይሃ ማሃ ቢኢሪ
 ሱኪንቴ ሻላታዎ ዑከና ዲጰቀሴ።

13 ዘሮ ዔኩዎ ዔኤያ ማዕ ጋርቺ ካኣቲፓ ጨንጫ ማዕ ማንቆ
 ዴጌ ባሺኤ። 14 ፔቴ ዓሲ ካይዘይዳፓ ሸይንቴቴያ ቱኡሲ ማርካፓ
 ከሰከያ ማዕቴያ ካኣታዳኒ ዳንዳዓኔ። 15 ሃያ ሳይደዳ ናንጋ ዓሳ
 ቢያ ካኣቲ ቤዛ ጌሊ ካኣታዳንዳ ፔቴ ዴጌሰከያኮ ጊንዎ ዓኣዳንቴ
 ታ ዛጌኔ። 16 ዬይ ካኣታዲ ዎይሃ ዎደና ዒዛም ዎርቃ ዴሪ ኮሺ
 ሚርጌኤ፤ ዒ ካኣቲማፓ ከዴ ዎደና ጋዓንቴ ዒ ማዴ ባኮ ዛሎ
 ዒዛ ጋላታንዳ ፔቴ ዓሲታዎ ጰዳዓከ፤ ዬይያ፣ ዠባሬ ኩቻ ዓርቃኒ
 ማላሢጉዴያ ጉሪ ባኣዚኤ።

5

ያኦሲ ዒጊጨሢ

1 ያኦሲ ካኣሸካኒ ያኦሲ ማኣሪ ኔ ጌሌ ዎደና ኮሺ ካፒንቴ፤
 ዒኢካ ዴንዳዎ ኮዠ ፑርቶይዳፓ ዲማሲ ዔሩቀዎ ዔኤዮ ዓሳ ማዳ
 ጎይዎ ያኦሲም ዒንጎ ዒንጊዎ ሸኢሺይይዳፓ ዘሮ ዑኡሲ ዎይዛኒ
 ጊኢጊንቴያ ማዓዳ ባሺኤ። 2 ኔ ጌሰታንዳሢኮ ቤርታ ማሌ፤ ያኦሲም
 ፔቴ ባኣዚ ዒንጋኒ ሩኡሩሞና ናኣቢ ናኣቢፓ፤ ያኦሲ ጫሪንጫ፣
 ኔኤኒ ጋዓንቴ ሳዓ ማዕሢ ማሊጋፓ ኔ ጌሰታ ባካ ዳካ ማዎንጎ።
 3 ማዴ ሚርጋዛ ዓውቲ ዓውታሳሢጉዲ ሚርጌ ዑኡሲ ዓኣ ቤሰካ
 ዔኤያቶ ጌኤሲ ፔጋዲ ዔርታኔ። 4 ያኦሲ ዔኤዮ ዓሰና ዎዛዲቀሴ፤
 ያኦሲም ፔቴ ባኣዚ ዒንጋኒ ኔ ናኣቤ ዎደና ቤዘማና ናኣቤ ባኮ ዒንጊ
 ኩንሣኒ ጊኢጌ። 5 ናኣቢ ኩንሡዎዎ ሃሺሢዳፓ ቤርታ ናኣቢባኣቴ
 ቃራኤ። 6 ጎማ ባንሢ ኔና ዔኪ ዓኣዲዎጉዲ ዳንጋ ኔኤኮ ሚርጌ

5:4 5:4 ዓይኑ. 66:13-14።

ጌስታንዳጉዲ ሃሺፖ፤ ያኦሲም ማዳ ዓሶ ቤርታ «ሃያ ታ ጌዔህ ዔሩዋያኮ» ጌይፖ፤ ያኦሲም ኔ ዒንጋኒ ናኦቤ ዑኡዞና ኔ ባኮ ኔኤኒ ባይዛያ ማሃኔ።⁷ ሚርጌ ዓውቲና ሚርጌ ጌኤሲና ጉሪኬ፤ ዩያይዳፓ ያኦሲ ዒጊጨ።

ዖርጎቹሞ ጉሪ ባኦዚ ማዔህ

⁸ ፔቴ ዓጨዳ ጌኔ ማዳንታኦና፣ ፒዜ ዎጌያ ፓጨሞ ማንቆ ዓሳ ሄርቁንታህ ዛጋያ ዲቃቲ ሄርሺፖ፤ ዓይጎር ጌዔቴ ፔቴ ፔቴ ዎይህ ዓሶኮ ዑጻ ማዒ ዛጋይ ዓኦኔ፤ ሃህ ቢያሂኮ ዑጻ ማዒ ዛጋይ ሜሌያኦ ዓኦኔ።⁹ ጎሺዳፓ ጴዳ ባኦዚ ቢያህ ማኦዳኔ፤ ካኦቲያ ማኦዳንታህ ዩያ ጎዛፓኮ።

¹⁰ ቢራ ናሽካ ዓሲ ቢራ ዴንቃዎ ሚሽኩዋሴ፤ ዖርጎቹ ማዒኒ ኮዓ ዓሲያኦ ዔኤቢ ዴንቁዎ ታኦም ጌዴኔ ጎዑዋሴ፤ ዩይያኦ ጉሪኮ።

¹¹ ቆሎ ሚርጋዛ ሚርጌሂጉዴያ ሙዓይ ሚርጋኔ፤ ዓካሪ፣ ዛጊ ዎዛዲሂዳፓ ዔቦ ዓደም ዓይጎ ዎኦታ ባኦዚ ዓኦይ? ¹² ሚኢሽ ጨገንቲም ማዳ ማዳ ዓሲ ሚርጌ፣ ሃንጎ ዳካ ሙዔቴያ ኮሺ ገንዖ ገንዒ ዎርቃኔ፤ ዖርጎጮ ዓሶኮ ቆሎ ሚርጉማ ጋዓንቴ ገንዖ ባይዛኔ።

¹³⁻¹⁴ ሃያ ዓጨይዳ ኮሺ ዎዩሳ ፑርታ ባኦዚ ሃህ ታ ዛጌኔ፤ ዩይ ዓይጎዳይ ጌዔቴ፡- ዓሲ ሜቶ ኬሊና «ኑና ማኦዳንዳኔ» ጌይ ቆሎ ቡኩሳኔ፤ ጋዓንቴ ፔቴ ዔርቲባኦ ፑርታ ባኦዚ ቆሎ ዔያቶኮ ባይዛዛ ዔያቶኮ ናኦቶም ዒንጎንድ ባኦዚያ ዓቱዋያ ማዒያኮ። ¹⁵ ዓሲ ዒንድ ጎጳፓ ካሎ ሸይንታኔ፤ ዒ ሃይቃዎ ሸይንቴማ ጎይያ ካሎ ማዒ ዴንዳኔ፤ ዒ ሜታዳ ባካፓ ፔቴታዎ ኩጫ ዔኪ ዓኦዳኒ ዳንዳዑዋሴ።

¹⁶ ካሎ ዒ ሸይንቴማጉዲ ሃይቃዎ ካሎ ዓኦዲፃ ሚርጌና ዎዩሳያኮ፤ ዒዛኮ ላቢፃ ቢያ ዢባሪ ኩቻ ዓርቃኒ ማሊሂጉዴያ ጉሪ ማዓቲ ዩይ ዓካሪ ዓይጎ ማኦዳይ? ¹⁷ ፔኤኮ ዒ ናንጎ ዎዶ ጋፒሴህ ዲሚ ዓቲ ናንጊዳ ዎዩሂና፣ ማሊ ሜታዲሂና፣ ሮኦጎናኮ።

¹⁸ ዓካሪ፣ ታኦኒ ዛጌ ኮሺ ማዔ ባኦዚ ዓይጎዳይ ጌዔቴ ዓሲ ሃያ ሳይይዳ ዓኦዎ ያኦሲ ዒንጌ ዳኮ ናንጎማ ጋራ ፔኤኮ ላቤ ባኮ ቢያ ሙይ ዑሽኪ ዎዛዲሂኮ፤ ዓሲም ዓይሂንቴማኦ ዩማ ሌሊኮ። ¹⁹ ያኦሲ ዓሲም ቆሎና ዖርጎቹሞና ዒንጌህ ዒ ላቤ ጎይያ ዴንቁ ሙይ ዑሽኪ ዎዛዳንዳጉዲኮ፤ ዩይያኦ ያኦሲ ዓሲም ዒንጌ ዒንጊሂኮ። ²⁰ ያኦሲ ዓሲኮ ዒኖ ዎዛሳሂር ዓሲ ዳካ ናንጌቴያ፤ ገንሃ ሃህ ሚርጌ ናንጋሂርዎ ኮሺ ሜታዲ ማሉዋሴ።

5:15 5:15 ዓ.ዮ. 1:21፤ ዓ.ይ.ኦ. 49:17፤ 1፻፵. 6:7።

6

1 ሃያ ሳባ ዓሲዳ ቢያ ሄላ ሚርጌና ፑርታ ባአዚ ታኣኒ ዛጌኔ።
 2 ጾሲ ዓሲም ቆሎጎታ ጾርጎቹዋጎታ ቦንቸዋ ቢያ ዒንጋኔ፤ ኮይሳ ባአዚዳፓ ዓይጎዋ ፓጩሲባአሴ፤ ያዲ ማዔታቴያ ዓሲም ዒንገንቴ ቆሎና ቢያ ዓሲ ዋዛዲዋሴ፤ ዒዚ ላቢንቴ ቆሎሢና ሜሌ ዓሲ ዋዛዲኔ፤ ዬይ ጉሪ ላቢሢ፤ ገንሣ ሃሣ ሚርጌ ፑርታ ባአዚኩ።³ ፔቴ ዓሲ ጭታ ናይ ሾዔቴ፥ ጾሲ ለዔ ዴይ ሚርጌ ዋዴ ናንጌቴያ፥ ዒዚ ዋዛዲንዳጉዲ ኮይሳ ባካፓ ቢያ ዒዛም ማዓያ ዒ ዴንቁዋጎ ጋፒንፃ ቦንቸንቴ ዴኡከንቴዋዎዋ ዓቴቴ ዬይ ማሊሳያኩ፤ ዬያጉዴ ዓሢዳፓ ሃይቁያ ማዒ ሾይንቴያ ባሽኬ ታ ጌዔኔ።⁴ ዓይጎር ጌዔቴ ዬይ ሃይቁ ሾይንቴሢ ጉሪ ማአዳ ባአዚባአያ ማዒ ኬዴኔ፤ ገንሣ ሃሣ ዲሚና ዲኡቴኔ፤ ሱንፃ ዒዛኮ ፔጋዲ ዔርቲባአሴ።⁵ ዒዚ ዓቢ ፖዒያአ ዛጉዋዎ፥ ናንገ ዓይጎ ማዔቴያ ዔሩዋዎ ሃይቁሢ ዬይ ሃንጎያይዳፓ ፔቴና ሃሃውሼኔ።⁶ ዓካሪ ላምፃ ጳንጩ ሺያ ለዔ ዋዛባአያ ናንጌቴ ዓይጎ ዒዛ ማአዳንዳይ? ሺራኣ ሺራ ላምፃንሢ ዓአዳሢ ፔቴ ቤሲኩ።

7 ዓሲ ማዲ ላባሢ ሙዎ ባአዚ ዴንቃኒኩ፤ ያዲ ማዔቴያ ማሊፃ «ታኣም ጌዴኔ!» ጌይ ሃውሹዋሴ።⁸ ጨንጫ ዓሲ ዔኤያሢዳፓ ባሻሢ ዓይጎናዳይ? ማንቆ ዓሲ ዋማይዲ ናንጋንዳቴያ ዔሪፃ ዓይጎ ዒዛ ማአዳይ? ⁹ ዓፃዲሢ ማሊሢና ዣኣሽከ ሺሪሢዳፓ ዓአፒና ዛገሢ ቃራኩ፤ ዬይያ ሃሣ ጉሪ፥ ዢባሪ ኩቻ ዓርቃኒ ማሊሢጉዴያኩ።

10 ሃሢ ዓአ ባኮኮ ቢያ ሱንሢ ቤርታ ጌሢንቴያኩ፤ ዓሲ ዋዚጉዴ ማዢንቴታቴያ ቤርታ ዔርቲያኩ፤ ፔጌዳፓ ዑሣ ዴዲ ማዔያና ጾልዚ ጾልታኒ ዓይጎ ዓሲያአ ዳንዳዑዋሴ።¹¹ ሚርጌ ኑ ጌሰቴ ዋድና ጎኔ ዓአፖ ማዓ ጌኤዘንሢ ዳካኩ፤ ዓካሪ ዬይ ዓሲም ዓይጎ ቃሳይ? ¹² ዳካ ማዔያ፥ ሺቢጉዲ ዓአዳ ዋደይዳ ዓሲም ኮሺ ማዓንዳ ባአዚ ዔራሢ ሃናይዳ? ገንሣ ሃሣ ዓሲ ሃይቁሰካፓ ሃያ ሳዎይዳ ዓይጌ ማዓንዳቴያ ጾኣኒ ኬኤዛኒ ዳንዳዓይ?

7

ናንገ ዛላ ማሊሢ

1 ኮሺ ሱንሢ ሚርጌ ሚኢሽ ኬሳ ሳውቃ ቲሺፓ ባሽኩ፤ ሾይንቴ ኬሊዳፓ ሃይቢ ኬሊ ኮሺኩ።

7:1 7:1 ኮኣኪ. 22:1።

2 ሃይቢ ዓሲ ቢያኮ ጋፒንሢ ማዕሢ ሸምፔና ዓኣ ዓሲ ዒና ዔኪ ዔራንዳፑዲ ሙኡዚ ማኣሪ ዓኣዲሢዳፓ ዩኤፒ ዓኣ ማኣሪ ዓኣዲሢ ቃራኩ።

3 ሚኢቲዳፓ ያዩሢ ኮሺኩ፤ ያዩንቴ ዓኣፒ ካራ ዒናም ቃራኩ።

4 ጨንጫ ዓሲኮ ዒና ዩኤፒ ዓኣ ማርካ ማዓኔ፤ ዔኤዮ ዓሲ ዒና ጋዓንቴ ዋዛ ቤሰካ ማዓኔ።

5 ዔኤዮ ዓሲ ኮዖ ዋይዚያይዳፓ ጨንጫ ዓሲኮ ዞር ዋይዚዖ ኮሺኩ።

6 ዔኤያ ዓሲኮ ሚኢቲ፡- ያቲ ዴንካ ዔኤቲ ዒንቃ ዓንጊሢፕዲ ማዕሢር ቡላሢባኣ ፕሪ ባኣዚኩ።

7 ንጌ ማደ ጨንጫ ዓሲ ዔኤያ ማሃኔ፤ ዴመና ዒንጎ ሚኢሽ ዓሲኮ ዒኔ ባይዛኔ።

8 ፔቴ ባኣዚኮ ዓይሢዳፓ ጋፒንሢ ኮሺኩ፤ ሆኦሊንቴ ንሰታ ዓሲዳፓ ዔኤቢ ጊቢ ዳንዳዓ ዓሲ ቃራኩ።

9 ዳጋ ዔኤያ ዓሲኮ ዑኩታሢር ዳጎ ማሊያ ኔኤኮ ጊቢ ዳንዳዔ።

10 ሃያፑዴ ያኦጨሢ ጨንጫ ዓሲ ያኦጨዋኣሢር «ሃያ ዋይይዳፓ ሚናኣ ዋደና ማዳንቴ ባካ ቢያ ዋዚ ኮሸካይ?» ንይ ያኦጨፖ፤

11 ዔኤቢ ዳካሊ ዔኪሢዳፓ ዔራቶ ዴንቁሢ ባሽ ማዕሢር ሃያ ዓጮይዳ ናንጋ ዓሳ ቢያ ጨንጫ ማዓንዳያ ኮይሳኔ፤ 12 ሚኢሽ ዓሲኮ ጎንጃ ማዒ ማኣዳሢፕዲ ዔራቶ ያዲኩ፤ ዩያፓ ባሽ ፔ ቆሎ ማሢ ዔራቶ ዓርቁሢም ሸምፖ ካፒ ዓይሳኔ።

13 ሢንዳ፡ ያኦሲ ማደ ማሊ ጳቁሢ፤ ያኦሲ ዋቢሹቴ ያኦኒ ፒሻኒ ዳንዳዓይ? 14 ዋዳ ኮሺ ማዓዛ ኔና ዋዛሶንጎ፤ ዋዳ ፑርታዛ ጋዓንቴ ማሊ ጳቁሢ፤ ሃያንታ ዩያንታ ማዳሢ ያኦሲኩ፤ ዩያር ዓሲ ዓይጎዋ ማዖም ሃጊ ሴካ ቤርታ ማዓንዳ ባኣዚ ዔራኒ ዳንዳዑዋሴ።

15 ታናንጌ ዳኮ ዋደማይዳ ፑርታ ማዳ ዓሲ ማዳ ዳቢንቶና ሚርጌ ሌዔ ናንጋንቴ፡ ኮሺ ዓሲ ፔ ኮሹሞና ባይቃንቴ ሚርጌ ታኦኒ ዛጌኔ፤

16 ዩያር ኔኤኒ ባይቁዋፕዲ ሚርጌና ጨንጫ ዓሲ፡ ጊንሢ ሚርጌና ዒሎ ዓሲኩያኣ ንይ ኔና ዛጊ። 17 ዋዳ ኔኤኮ ሄሎዋንቴ ሃይቢና ኔ ካኣሙዋፕዲ ሚርጌ ፑርታ፡ ጊንሢ ሃሣ ዔኤያኣ ማዓፖ። 18 ፔቴዞ ዓርቃዖ፡ ማሌዞዋ ሃሺባኣቴ ቃራኩ፤ ያኦሲ ዒጊጫ ዓሲ ፔቴማ ሌሊ ባሽኩ ንይ ደዲዋሴ።

19 ፔቴ ካታማይዳ ናንጋ፡ ዓሲ ዋይሣ ታጳ ዓሲዳፓ ባሽ ማሊ ጳቁሢ ዓሲም ዔራቶ ዋልቁ ዒንጋኔ።

7:9 7:9 ያይ. 1:19።

20 ፔቴታፖ ዳቢንቴዎፖ ቢያ ዎዴ ኮሺ ባአዚ ማዳ ዲሎ ዓሲ ሳዓይዳ ባአሴ።

21 ጌሰቲንታ ሃይሶ ቢያ ዎይዛኒ ኮይፖ፤ ጎፖንቴ ኔኤኮ ዓይላሢ ኔና ጫሽካንቴ ኔ ዎይዛንዳያ ናንዳኔ። 22 ሚርጌ ዎዴ ኔኤኒ ኔ ቶኦኪና ሜሌ ዓሶ ጫሽኪ ጫሽኪ ናንጌሢ ሲና ኔኤኮ ዔራኔ።

23 ታኣኒ ታኣኮ ዓኣ ዔራቶና ሃያ ቢያ ዛጊ ዔራኒ ማሌኔ፤ ሚርጌና ጪንጫ ዓሲ ማዓኒያኣ ታ ኮዔኔ፤ ጋዓንቴ ዬይ ታ ኮይላፓ ሃካያ ማዔኔ። 24 ጪንጩዎ ዎይቴቴ ዎይቴቴያ ሄለንቴዎ፣ ሃኬታሢሮ ፆኦኒ ዬያ ሄላኒ ዳንዳዓይ? 25 ዬያሮ ጪንጩዎና ዔኤቢ ቢያኮ ጎይሢ ዛጊ ዔራኒ ታ ማሌኔ፤ ዬይያኣ ፑርታ ማዶ ዔኤዩዎ ማዔሢ፣ ጊንሣ ሃሣ ዔኤዩዎ ዣኣሹዎ ማዔሢ ታና ዔርዜኔ።

26 ሃይቢዳፓ ባሽ ጫንቃያ ሜሌ ባአዚ ታ ዴንቄኔ፤ ዬይያኣ ላኣሊ ፒራ ፒሮኬ፤ ላኣሊ ሮኦጮ ሱዞ ማላያ ማዔ ናሹዎ ፒራሢና ዓቲንቆ ፒራኔ፤ ጊንሣ ሃሣ ዓንጊ ዲፃጉዴያ ማዔ ዒዛኮ ቃሶና ማሪ ዓርቃኒ ኮዓኔ፤ ፆኦሲ ዒጊጫ ዓሲ ሌሊ ዒዛይዳፓ ቶላኒ ዳንዳዓኔ፤ ጎማዴ ዓሲ ጋዓንቴ ዒዛ ፒራሢዳ ዓዲንታንዳኔ። 27 ጪንጩ ዓሢ ሂዚ ጌዔኔ፡- «ሃይሾ፣ ታኣኒ ኮሺ ዛጊ ዴንቄ ሜሌ ባአዚ ሃሣ ያዲኬ፤ 28 ዬይ ባካ ኮሺ ታ ዛጊይይዳ ዓኣፖ ዴንቄባኣ ባአዚኬ፤ ሺያ ዓቲንቄይዳፓ ፒዜ ዒና ዓኣኔ ጌይንታኒ ኮይሳ ፔቴ ዓቲንቄ ሌሊ ታኣኒ ዴንቄኔ፤ ላኣሎ ባኣካፓ ጋዓንቴ ፔቴ ላኣሊታዎ ታኣኒ ዴንቄኒ ዳንዳዒባኣሴ። 29 ታ ኮሺ ዛጊ ዔራ ሜሌ ባአዚ ዓይጎዳይ ጌዔቴ ፆኦሲ ዓሲኮ ዒና ፒዜ ማሂ ማኸሢኬ፤ ዓሲ ጋዓንቴ ሚርጌ ጌኔ ማዳ ጎይሢ ማኸ ማኸ ኬሴኔ።»

8

1 ጪንጫ ዓሲጉዴይ ያናዳይ? ዔኤቢኮ ቢያ ቡላሢ ዔራይ ያናዳይ? ዔራቶ ዓሲኮ ዓኣፒ ካራ ፖዒሣኔ፤ ካርቴ ዓኣፖ ካሮዎ ቡቡላኔ።

ካኣቲዎ ዓይሢንጉሢ

2 ካኣቲዎ ታኣኒ ዓይሢንታንዳኔ ጌይ ፆኦሲዎ ኔኤኒ ጫኣቄሢር ካኣቲዎ ጉሙርቄንታያ ማዔ። 3 ካኣቲ ቤርታፓ ዒ ጋዓ ባኮ ዎይዚ ዒዒ ሩኡሪና ኬሰኪፖ፤ ዒዚ ናሽኬ ባአዚ ማዳኒ ዳንዳዓሢሮ ፑርታ ማዳና ደዲፖ። 4 ካኣቲኮ ቢያ ባአዚ ማዳኒ ቢታንቶ ዓኣሢሮ «ዓይጎሮ ኔ ሃያ ማዴይ?» ጌይ ዒዛ ፆኦጫንዳይ ባአሴ። 5 ዒዛኮ ዓይሢያ ማዳ ኔ ኩንሣቴ ሜታ ኔና ሄላዓኬ፤ ዬይ ቢያ ማዳንታንዳ ዎድና ማዓንዳ ጎይፆዎ ዲማሲ ዔራሢ ጪንጫ ዓሲ ሌሊኬ። 6 ሜታ ቢያ ዎዴ ዓሲ ሜታሳያ ማዔቴያ ቢያ ባአዚኮ ዎዴንታ ማዓ ጎይሢንታ

ዓኣኔ። 7 ሃገሪ ሴካ ቤርቲም ማዓንዳ ባኣዚ ዲማሲ ዔራ ዓሲ ባኣሢሮ «ያዲ ማዓንዳኔ» ጌይ ኬኤዛንዳይ ያናዳይ? 8 ሸምፖ ዓይሳኒና ሃይቢ ኬሊ ቦካኒ ዳንዳዓይ ያኣኒያ ባኣሲ፤ ዓይጎ ዓሲያኣ ያልዚ ቤሲዳፓ ዓኣዳኒ ዳንዳዑዋኣሢጉዲ ፑርቲምፑ ፑርቶ ማዳ ዓሶ ሃሹዋሴ።

ፑርታ ዓሲና ኮሺ ዓሲና ዛላ ባኣዚ

9 ሃያ ሳይይዳ ማዲንታ ባኮ ዒናፓ ታ ዛጋይ ሃያ ባኮ ማሊ ታ ጳቂሣይ፤ ፔቲ ዓሲ ባጋሢ ባይዛኒ ቢታንቶና ዋይሣ ዋዴ ዓኣኔ። 10 ፑርቶ ማዳ ዓሳ ቦንቾና ዲኡታሢያ ታ ዛጌይ፤ ያኣሲ ዓሳ ጋዓንቴ ያኣሲም ዲማዴ ካታማፓ ኬሰኪ ዓኣዲ ዋሊንታኔ፤ ዬይያኣ ቢያ ጉሪኮ።

11 ዓሳ ዔሬዎ ዓይጋ ፔና ዋጌና ያኣጪሳ ባኣዚ ማዳይ? ዬያ ማዳ ሻሢ ሜሌቱዋንቴ ዬያ ማዳ ዓሶ ዑፃ ዑኩና ኮይሳ ጎይዎ ዋገንቱዋኣሢሮኬ። 12 ጎሜ ማዳ ዓሲ ዋጌና ያኣጪሳ ባኣዚ ዪኤታ ማይንቴ ማዳዎ ሚርጌ ዋዴ ናንጋያ ማዓያታቲያ ያኣሲ ዒጊጫ ዓሶና ቦንቾ ዓሶም ቢያ ባኣዚ ኮሻካሢ ታኣኒ ዔሬይ። 13 ፑርቶ ማዳ ዓሶም ጋዓንቴ ዓይጎ ባኣዚያኣ ገኢጉዋሴ፤ ዔያታ ያኣሲ ዒጊጫዋኣሢሮ ናንጋ ዔያቶሲ ሸቢጉዲ ዓኣዳኔ፤ 14 ዬያ ሌሊቱዋንቴ ሳይይዳ ማዲንታ ሜሌ ጉሪ ባኣዚያኣ ዓኣኔ፤ ፔቲ ፔቲ ዋዴና ኮሺ ማዳ ዓሳ ፑርቶ ማዳ ዓሶ ሃላንዳ ሜቶ ዔካኔ፤ ፑርቶ ማዳ ዓሳ ሃሣ ኮኾ ማዳ ዓሶ ሃላንዳ ባኣዚ ዔካኔ፤ ዬይያኣ ቢያ ጉሪኮ ታኣኒ ጌዔይ።

15 ዬያሮ ዓሲ ሃያ ሳይይዳ ናንጋኣና ኮይሳሢ ሙኡዚ፤ ዑሺና ፔና ዋዛሲሢታሢ ታ ዔሬይ፤ ያኣሲ ሃያ ሳይይዳ ናንገሻ ዋዶማና ዒ ማዳ ማዳና ዋዛዲ ናንጋይ።

16 ዔራ ማዓኒና ሃያ ሳይይዳ ማዲንታ ባኮ ቢያ ኮሺ ዛገ ዔራኒ ታ ማሌ ጎይያና ዓሲ ዋንቴና ሮኦሪና ሃውሾ ባኣያ ላቢሢና ናንጋያታሢ ታ ዴንቄይ። 17 ያኣሲ ማዳ ባኮ ቢያ ታ ዛጌይ፤ ሃያ ሳይይዳ ማዲንታ ባኮ ያኣኒያ ዔራኒ ዳንዳዑዋሴ፤ ዓሲ ሚርጌ ባኣዚ ኮሺ ዛገ ዔራኒ ዋዚ ላቢንቴያ ፔቲ ባኣዚያ ዴንቃኒ ዳንዳዑዋሴ፤ ጎኔና ጪንጮ ዓሳ «ሃያ ኑ ዔራኔ» ጋዓኒ ጫርቃንዳያ ናንዳኔ፤ ጋዓንቴ ዔያታ ዔራ ባኣዚ ባኣሴ።

9

1 ዬያ ባኮሮ ሚርጌ ዋዴ ኮሺ ታኣኒ ማሌሰካፓ ዪሎ ዓሶንታ ጪንጮ ዓሶንታኮ ማዳ ያኣሲ ኩጫ ማዔሢ ታ ዛጌይ፤ ዬያሮ ሃገሪ ሴካ ቤርቲም ማዓንዳ ባካ ናሹምታቲያ ዒዲሢ ቤርታዲ ዔራ ዓሲ

ባኣሴ። 2 ዓይጎናኣ ዲማሱዋዎ ዓሎንታ ጎሞሲንታ፣ ሃሣ ኮዦ ማዳ ዓሎንታ ፑርቶ ማዳ ዓሎንታ፣ ጌኤዦ ዓሎንታ ጌኤዦቱዋ ዓሎንታ፣ ያኣሲም ዒንጎ ባኮ ዒንጎ ዓሎንታ ዒንጉዋ ዓሎንታማኣ ዒንገንታንዳ ባካ ዋሊጉዴያኬ፤ ዬይያኣ ኮዦ ዓሂም ማዳንታ ጎይዎ ጎሞሲማኣ ማማዲንታኔ፤ ጨኣቁዋ ዒጊጨ ቦንቻሂንታ ቦንቹዋኣሂንታም ማዳንታንዳ ባካ ሄኮኬ። 3 ሳዓይዳ ማዳንታ ባኮኮ ቢያ ፑርቱማ ዬያኬ፤ ቢያሂኮ ጋፒንፃ ፔቴኬ፤ ዓሳ ናንጋ ዎዶ ቢያይዳ ማሊፃ ዔያቶሲ ፑርቱሞና ዒኖይዳኣ ዔያቶኮ ዣኣሹዋ ኩሚያኬ። ጋፒንፃ ዔያታ ሃይቃንዳ። 4 ሃይቁ ዘቢዳፓ ሳዛና ዓኣ ካጊ ባሼ ማዓሂጉዲ ሼምፔና ናንጋ ዓሳ ባኣካ ናንጋ ዓሲኮ ሃጊ ማዓዎዛ ዓኣኔ። 5 ሼምፔና ዓኣ ዓሳ ፔቴ ኬሊ ሃይቃንዳሂ ዔያታ ዔዔይ፤ ሃይቁ ዓሳ ጋዓንቴ ፔቴ ባኣዚታዎ ዔሩሞሴ፤ ጋፒንሂ ዔያታ ዋሊንቴያ ማዔሂሮ ፓሣ ባኣዚ ባኣያኬ። 6 ዔያቶኮ ናሹሞንታ ዒፃንታ ቂኣሩሞንታ ቢያ ዔያቶና ዎላ ሃይቁኔ፤ ሃያ ዓጫ ማዳንታ ባኮ ናንጊና ዔያታ ማዳዎያ ማዓኔ።

7 ያኣሲ ሚና ቤርታ ኔኤም ዓይሂሂሂ ሃያታሂሮ ዓኣዳ፤ ሙዎ ኔኤኮ ሙዔ፣ ዎይኖ ዑዦዋ ዑሽኪ ዴኤቦ ዛኣሪ ዎዛዴ። 8 ቢያ ዎዴ ቦኣሬ ዓፒላ ማይንቴ ቶኣኮዋ ኔኤኮ ቲሽቴ። 9 ሃያ ሳዓ ያኣሲ ኔኤም ዒንጌ ጉሪ ማዔ ናንጎይዳ ቢያ ኔኤኒ ኔኤኮ ናሽካ ማቾና ዎላ ዎዛዴ፤ ኔኤኮ ሳዎ ሚታሂ ናንጎይዳ ኔ ላባ ባኮኮ ቢያ ኔኤም ዒንገንቴማ ዬያኬ። 10 ኩጫ ኔኤኮ ማዳ ባኮ ቢያ ማዲ ኩንሂ፤ ኔ ሃይቁ ዴኡቴሰካፓ ማዳንታ ማዳኒ ማሊ ቱኪሂንታ ጨንጨሞዋ ባኣሴ።

11 ሜሌ ሃሣ ሳዎይዳ ታ ዛጌ ባኣዚ ዓኣኔ፤ ዬይያኣ፡- ሩኡሪ ጳሽካ ዓሳ ቢያ ዎዴ ባሺ ቢሩዋኣሂ፣ ያሎና ዔርቱ ዓሳ ቢያ ዎዴ ያሊ ባሹዋኣሂ፣ ዔሮ ዓሳ ሙዎንዶ ባኣዚ ቢያ ዎዴ ዴንቁዋኣሂ፣ ጨንጨ ዓሳ ቢያ ዎዴ ቆሎ ዴንቁዋኣሂ፣ ዔራቶ ዓኣ ዓሳኣ ቢያ ዎዴ ቦንቹንቱዋኣሂኬ፤ ጋዓንቴ ቢያሂ ፔቴ ፔቴና ፑርታ ባሊቲ ሄላኔ። 12 ያዲ ማዔቴያ ፔቴ ፔቴ ዓሳ ዬይ ፑርቶ ባካ ዓይዶ ዔያቶ ሄላንዳቴያ ዔሩሞሴ፤ ካፒ ፒሮና ዓዲንታሂጉዲ፣ ሞላኣ ፑርታ ባሊቲና ፒራሂዳ ጌሊ ዓዲንታሂጉዲ ዓሲ ቢያ ማሊባኦ ፑርታ ባኣዚና ዓዲንታኔ።

ዔራቶ ዔኤያቶይዳፓ ባሼ ማዔሂ

13 ዬያጉዲ ሃሣ ሳዎይዳ ታኣኒ ዛጌ ሜሌ ባኣዚ ዓኣኔ፤ ዬይያኣ፡- ዔራቶ ዴኤፒ ኮኣኪንሂ ማዔሂኬ። 14 ዳካ ዴሬ ናንጋ ፔቴ ዳካ ካታማሰኬና ዓኣኔ፤ ዬኖ ካታሚሎ ፔቴ ዎልቁና ዓኣ ካኣቲ ያላኒ ዔሩሞንቴ ሙኪ፣ ዙሌና ዴኤፒ ዎርዲዬ ቤሲ ኮሺ ዒዞ ማንጌ።

15 ዲማና ዬኖ ካታሜሎይዳ ናጎጋ ፔቲ ጨንጫ ማንቆ ዓሲስኬይ ካታሜሎ ፔ ጨንጩምና ዓይሴኔ፤ ጋዓንቴ ዬያ ማንቃሢ ጾኒያ ማሊ ጳቂሢባኣሴ። 16 ታኣኒ ዲማና ጨንጩም ዋልቁይዳፓ ባሼ ማዔሢ ዔሬኔ፤ ጋዓንቴ ማንቆ ዓሢኮ ጨንጩማ ዲኡኪንቴኔ፤ ዑኡዛኣ ዲዛሲ ዋይዚንተባኣሴ። 17 ዔኤዮ ዓሶ ዋይሢ ዓሲ ዔያቶ ባኣካ ዲላታሢዳፓ ታሢ ኬኤዚንታ ጨንጫ ዓሲኮ ዑኡዛ ዋዋይዚንታ። 18 ጨንጩም ያልዚ ዓንጋምይዳፓ ባሼኬ፤ ጋዓንቴ ፔቲ ጎሜ ዓሲ ሚርጌ ኮሺ ባኣዚ ፑርተሳ።

10

1 ሃይቁ ወፃሌ ሳውቁሲ ኮሸና ቲዦ ዛይቶ ዛዛዒሳኔ፤ ዬያጉዲ ዳካ ዔኤያቶ ዳኤፖ ዔራቶና ቦንቾና ባይዛኔ።

2 ጨንጫ ዓሲኮ ዒና ፒዜ ማሊሢዳ ማዓዛ፣ ዔኤያ ዓሲኮ ጋዓንቴ ዳቢንቴ ማሊሢዳ ማዓኔ። 3 ዔኤያ ዓሲ ሃንታ ጎይይይዳ ቢያ ማሊሢ ባኣያ ማዓኔ፤ ዬያይዲያና ዓሲም ቢያ ፔኤኮ ዔኤያቶ ፔጋሲ ዔርዛኔ።

4 ዚቲ ጌይ ጊቢ ዳንዳዒሢ ዳኤፒ ዳቢንቴ ጋጋፕሳሢር ኔኤኮ ሱኡጋሢ ኔና ጎራ ዋደና ኔኤኒ ማዳ ቤዛፓ ዓጊዲፖ፤

5 ሃሢ ሳይይዳ ሜሌ ፑርታ ባኣዚ ታ ዛጌኔ፤ ዬይያ ዓሶ ዋይሢ ዓሳ ማዳ ጌኖ ማዶኬ። 6 ዔኤዮ ዓሳ ዳግ ጌዔ ቢታንቶ ዳንቃዛ፣ ያርጎጮ ዓሳ ጋዓንቴ ኬኤሪንቴያ ማዒ ሂርኬ ቤሲዳ ማዓኔ። 7 ሱኡጋ ሚኢሺ ጨንጎም ማዳ ዓሶጉዲ ቶኪና ሃንታዛ፣ ዬይ ማዳ ዓሳ ጋዓንቴ ፓር ቶጊ ዓኣዳያ ታ ዛጌኔ።

8 ዔቴ ቦኣካ ዓሲ ፔኤር ዬያ ዔታ ሎኦማኒ፣ ቲኢሢ ሻሃሢያኣ ሾኦሺና ዳይንታኒ ዳንዳዓኔ፤ 9 ሹቹ ቦኦኪ ኮላሳ ዓሲ ፔኤር ፃኣማዳኔ፤ ሚሢ ጳላሢያኣ ዒ ጳላ ሚፃ ዒዛይዳ ሜቶ ሄሊሳኔ።

10 ሄርጋ ቱኒ ዋርቁንቴባኣቴ ሚርጌ ዋልቁ ጋፕሳኔ፤ ጨንጩም ጋዓንቴ ማዳ ማዳ ዓኣፓንዳጉዲ ማሃኔ። 11 ማርሾና ኔ ደሊሳንዳሢኮ ቤርታ ሾኦሺ ኔና ዳዔያታቴ ማርሻ ዓይጎዋ ኔና ማኣዲዋሴ። 12 ጨንጫ ዓሲ ፔ ጌኤዞና ቦቦንቹንታኔ፤ ዔኤያ ዓሲ ጋዓንቴ ፔ ጌኤዞና ባይቃኔ፤ 13 ዔኤያ ዓሲ ጌኤዞ ዔኤያቶና ዓርቃያ ዳኤፒ ዣኣሹምና ጋፕሳኔ። 14 ዔኤያ ዓሲ ካራባኣ ሃይሴ ሚርጊሻኔ።

ሃጊ ሴካ ማዓንዳ ባኮ ዔራ ዓሲ ባኣሴ፤ ዓሲ ሃይቁሰካፓ ማዲንታ ባኮ ዒዛም ኬኤዛይ ባኣሴ።

15 ዔኤያ ዓሲኮ ማዳ ዒዛ ላላቢሳኔ፤ ካታም ባንሢ ዔኪ ዓኣዳ ጎይያ ዒ ዔራዋሴ።

10:8 10:8 ዓይኑ. 7:15፤ ኮኣኪ. 26:27።

16 ዓና፤ ካኣቲ፣ ኔኤኮ ናይ ማዕዘ፣ ሱኡጋኣ ኔኤኮ ጉቴና ዓኣንቴ ሙኡዚ ገኢጊሻ ዓጨፍሌ ኔና ባዴዔ። 17 ኔኤኒ ካኣቲ፣ ኔኤኮ ቦንቸንጎታ ዜርፃፓ ማዕ፣ ዶዶሞና ዎልቁና ዴንቃኒ ሌሊ ዳካና ሙይ ዑሽካ ሱኡጋ ዓኣ ዓጨፍሌ ኔ ዓንጂንቴያኩ።

18 ፔቴ ዓሲ ቤልፃ ማዕቴ ማኣራ ዒዛኮ ዛላዳኔ፣ ፆዲያ ፆፆዳኔ።

19 ሙኡዚ ሚኢቸሞ ገኢጊሻኔ፣ ዎይኔ ዑሺያ ኔና ዎዛሳያ ማዕኔ፤ ፆዲ ማዕቴያ ሚኢሹ ባኣንቴ ዬይ ቢያ ጴዶሞሴ።

20 ታና ዎይዛ ዓሲ ባኣሴ ገይ ዓኣሺንጎታቶዎ ካኣቲ ዶንኪፖ፤ ኔ ላሃ ቤዛ ሻኣላ ዓኣያ ፆርጎጫሢ ጫሽኪፖ፤ ገይንጎታ ባኮ ዴሚና ዎይዛ፣ ገኤዘ ዔኪ ሃንጎታ ዓሳ ካፒጉዲ ጋኣሲና ባራኒ ዴንዲ ዬያ ኔኤኮ ኩኤዛኒ ዳንዳዓኔ።

11

ዔር ዓሲ ማዳኒ ኮይሳ ባኣዚ

1 ዒንጋኒ ኮይሳሢሞ ኮሹሞና ዚቲ ጋዓፆ ዒዒንገ፤ ሚርጌ ዎዴኮ ገንፃፓ ኔ ዬያ ዛሎ ዴንቃንዳኔ። 2 ሴካ ቤርታ ሳይይዳ ዓይጎ ባኣዚ ማዕንዳቲያ ኔ ዔሩዎሴ፤ ዬያሮ ኔኤኮ ዓኣ ቆሎ ላንካይ፣ ሃንጎ ሳሊ ቤሲ ፓቁ ገሢሢ።

3 ሻኣራ ሚርጌ ካርቴ ዎዶና ዒርዚ ዎዋርቃኔ፤ ሚሢ ሊካ ማዕቴያ ሌካ ዶዔቴ ዒኢካ ዶዔ ቤዛ ዓታኔ። 4 ዠባሬ ካፓሢ ዜርሢ ዜርቁዎሴ፤ ሻኣራ ዛጋሢ ሃኣኮ ካሢ ዓርሡዎሴ። 5 ዠባሬ ሃንጎ ሳይሢንጎታ ዓሲኮ ሹምፓ ዒንዶ ሳይይዳ ማዠንጎታ ሳይፆዎ ኔ ዔሩዎኣሢጉዲ ቢያ ባኮ ማዠ ፆኦዛሢ ፔ ማዶ ዎመይዲ ማዳቲያ ዔራኒ ኔ ዳንዳዑዎሴ። 6 ጉቴ ማዕቴያ ዓባ ገላ ዜርሢ ዜሪፆ ሃሽፖ፤ ቢያሢ ባቃላንዳሞ ባቃላንዳሞ ዎኖ ዎዶና ዜርቁቴ ባቃሊ ካፃንዳቲያ ዴማሲ ኔ ዔራኒ ዳንዳዑዎሴ።

7 ፖዒ ዛገ ሚሸኩዎ ባኣዚኬ፤ ዬያሮ ሮኦር ፖፆ ዛገ ዛገ ዎዛዲፃ ኮሺኬ። 8 ዓሲ ዎዚ ሚርጌ ለዔ ናንጌቲያ ዬንሢ ዒዛሞ ዒንገንጎታ ዎዶንሢዳ ቢያ ዎዛዳኒ ዒ ዳንዳዓኔ፤ ጋዓንጎታ ሚርጌ ዲሚ ኬሊያኣ ዓኣሢ ማሎንጎ፤ ዬይ ኬላ ሚርጌኬ፤ ሙካንዳ ባካ ቢያ ጉሪ ባኣዚኬ።

ዴገም ማዕ ዞር

9 ዴገዘ! ኔኤኒ ዴገ ዓኣ ዎዶማና ዎዛዴ፤ ኔኤኮ ዴጎቶ ዎዶማና ዒሩ ኔኤኮ ዎዛሴ፤ ኔ ሹና ገዔ ሳይፆ ዓኣፓ ኔኤኮ ዛጋ ባኮ ቢያ ማዳ፤ ጋዓንጎታ ዬያ ቢያ ባኮሮ ፆኦሲ ኔና ዎጌ ቤሲ ዔኪ ሙካንዳሢ ዔራ።

10 ዬያሮ ማሊ ሂርጊሢ ሲናፓ ኔኤኮ ባይዘ፤ ፑርታ ባኣዚያኣ ኔጊዳፓ ሺኢሼ፤ ዴጋቶ ናንጊና ሄርሺንቴሢ ጉሪ ባኣዚኬ።

12

1 ማታሳ ዎዴ ሄለባኣንቴ፤ «ታና ዎዛሱዎሴ» ኔ ጋዓ ለዓ ሙኩዎንቴ፤ ዴጋቶ ዎዶና ኔና ማገፍሢ ማሌ። 2 ዓቦንታ ዓጊኖንታ ዠኦጋሢ ፖዓኣ ኔኤም ዲሙዎንቴ፤ ዒራ ዋርቁሰካፓ ሻኣራ ቤዛፓ ዔቁዎንቴ፤ 3 ማኣሮ ካፓ ዓሳ ጎጋይቃ ዎዶና፤ ዶዲ ማዔ ዓሳ ጊኢራፓ ዎቢ ኩንታ ዎዶና፤ ሃኣኮ ዎዶ ዓሳ ዳካ ማዒያይዳፓ ዔቁያና ሃኣኮ ዎዶ ዔያታ ሃሻዛ፤ ፑልቶ ካሮና ዛጋ ዓሶኮ ዓኣፓ ቴሊዮ ጌይ ዠኣሊ ዛጋዛ፤ 4 ዓሳ ቡካ ጰኣኮ ባንሢ ኬሰካ ካራ ዎዲንታዛ፤ ዎንፃ ያኦላ ዑኡዛ ባይቃዛ፤ ዓሲያ ካፒ ያኦሌም ጰጫዛ፤ ዓይኑማኣ ቢያ ላባዛ፤ 5 ሌካ ዲኮ ኬዛ ዒጊቻዛ፤ ቶኮና ሃንቲፃ ማታሳያ ማዓዛ፤ ሌውዜ ጌይንታ ማፃ ቡናዛ፤ ዓቢፃ ዬያኮ ቶኦኮ ጎቻዛ፤ ኮይሳያ ማዓ ባኣዚ ባይቃዛ፤

ዬና ዎዶና ዓሲ ፔኤኮ ናንጊና ናንጎ ማኣሪ ዓኣዲንዳኔ፤ ዬኤፖ ዬኤካ ዓሳ ጰኣካ ዬኤኪ ዬኤኪ ሺራንዳኔ። 6 ቢሮ ዓንጋፓ ኮሾና ቁንታሢ ዲጰዎንቴ፤ ዎርቆፓ ኮሺንቴ ፖያ ጌሃ ሻሮና ማቁዎንቴ፤ ዎኣያ ዲዎ ጉዛ ዓልቃ ዎኣያ ካራ ሃይቁዎንቴ፤ ዔታፓ ዎኣያ ጎቻ ሱዛ ዲጰዎንቴ፤ 7 ዓሻካ ሊካ ዓጮ ባንሢ ማዒባኣንቴ፤ ሺምፓሢያ ሌካ ማገፍ ያኦዛሢ ባንሢ ዓኣዲባኣንቴ ኔና ማገፍ ያኦዛሢ ማሌ።

8 ዔራሢ ኬኤዛያ፡- «ጉሪ፡ ቢያ ባኣዚ ጉሪኬ!» ጌዔኔ።

ጋፒንሢ ሃይሴ

9 ዔራሢ ጨንጩሞ ሌሊቱዎንቴ ዔራቶዎ ዳሮ ዔርዚሢ ሳርቁኔ፤ ማርጌ ኮኦኪንሢ ኮሺ ዛጊ ዔራሰካፓ ዎሊ ሄሊሲ ጊኢጊሼኔ፤ 10 ዔራሢ ፒዜ ማዔ ሃይሶ ዴንቃኒ ኮሺ ዛጌኔ፤ ዬያሮ ዒዚ ፃኣፔ ባካ ቢያ ጎኔ፤ ሃሃ ፒዜ ባኣዚኬ። 11 ዔሮ ዓሶኮ ጌኤዛ ጌማቶ ጎሽኮሮ ዓጨሶና ዓንጎጉዲኬ፤ ዬይ ፔቴይዳ ቡኩሲንቴ ኮኦኪንሢ ኮሺ ጌልዚ ጰርቆና ፃውናጉዲ ማዓዛ፤ ዬይ ቢያሢ ቆልሞ ሄንቃ ፔቴ ዓሲ ኬኤዜም ዔኮናያኬ።

12 ታ ናዓሢዮ! ሃያ ጌይንቴሢፓ ዑሃ ዓይጎ ባኣዚ ማዔቴያ ኔና ዔሬ፤ ሃያይዳ ፔቴ ባኣዚታዎ ቃሲፖ፤ ማርጌ ማፃኣፔ ፃኣፒ ኩርሳኒ ፔቴታያ ዳንዳዒንቴዎሴ፤ ዔኤቢ ዔራኒ ማርጌ ማሊ ሃንቴሢ ኔና ላቢሳኔ።

13 ዓካሪ ሃይሾ፡ ቢያ ባካ ኬኤዚንቴኔ፤ ቢያ ባኮኮ ጋፒንፃ ዬያኬ፤ ያኦሲ ዒጊጩ፤ ዓይሢያዎ ዒዛኮ ካፔ፤ ዬይ ዓሲ ማዳኒ ኮይሳ

ባአዚኬ። 14 ኮሺ ማደ ማዔቴያ ፑርታ ማደ፣ ዓአሺንቴ ባኮዋ ቢያ
ዓይሱዋዎ ያኦሲ ዎጌ ቤሲ ዔኪ ሺአሻንዳኔ።

ጌሌዥ ማጻሕፍት
The Holy Bible in the Maale language of Ethiopia,
using Ethiopic script

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

ጌሌዥ ማጻሕፍት

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-13

PDF generated using Haiola and XeLaTeX on 21 Feb 2024 from source files dated 14 Apr 2023

bbcfb90a-3ae3-5452-983d-6c4c02375929